

四庫全書

集部

欽定四庫全書

集部

東坡全集卷二十七

詳校官庶吉士臣謝恭銘

檢討臣何思鈞覆勘

總校官進士臣朱鈴

校對官編修臣戴聯奎

謄錄監生臣郭在盤

欽定四庫全書

東坡全集卷二十七

宋 蘇軾 撰

詩六十六首

次韻荅荆門張都官維見和惠泉詩

楚人少井飲地氣常不洩蓄之為惠泉
至若有所拆泉源本無情豈問濁與澈
貪愚彼二水終古恥莫雪只應所處然
遂使語異別泉旁地平衍泉上山嵒嶮
君子慎所居此義安可闕古人貴言贈
敢用况高節不為冬霜

乾肯畏夏日烈泠泠但不已海遠要當徹

涖陽早發

富貴本先定世人自榮枯
器器好名心嗟我豈獨無
不能便退縮但使進少徐
我行念西國已分田園蕪
南來竟何事碌碌隨商車
自進苟無補乃是懶且愚
人生重意氣出處夫豈徒
永懷江陽叟種藕春滿湖

夜行觀星

天高夜氣嚴列宿森就位
大星光相射小星鬧若沸
天

人不相干嗟彼本何事世俗強指摘一一立名字南箕
與北斗乃是家人器天亦豈有之無乃遂自謂迫觀知
何如遠想偶有以茫茫不可曉使我長歎喟

漢水

捨棹忽逾月沙塵困遠行襄陽逢漢水偶似蜀江清蜀
江固浩蕩中有蛟與鯨漢水亦云廣欲涉安敢輕文王
化南國遊女儼如卿洲中浣沙子環珮鏘鏘鳴古風隨
世變寒水空泠泠過之不敢慢佇立整冠纓

萬山

西行度連山北出臨漢水漢水蹙成潭旋轉山之趾
禪房久已壞古甃含清泚下有仲宣欄縵刻深容指回頭
望西北隱隱龜背起傳云古隆中萬樹桑柘美月炯轉
山曲山上見洲尾綠水帶平沙盤盤如抱珥山川近且
秀不到懶成恥問之安能詳畫地費簪筓

隆中

諸葛來西國十年愛未衰今朝遊故里蜀客不勝悲誰

言襄陽野生此萬乘師山中有遺貌矯矯龍之姿龍蟠
山水秀龍去淵潭移空餘蜿蜒迹使我寒渟垂

竹葉酒

楚人汲漢水釀酒古宜城春風吹酒熟猶似漢江清者
舊何人在丘墳應已平惟餘竹葉在留此千古情

鮪魚

曉日照江水遊魚似玉瓶誰言解縮項貪餌每遭烹杜
老當年意臨流憶孟生吾今又悲子輟筯涕縱橫

望夫臺

在忠州南
數十里

山頭孤石遠亭亭江轉船回石似屏
可憐千古長如昨船去船來自不停
浩浩長江赴滄海紛紛過客似浮萍
誰能坐待山月出照見寒影高伶俜

永安宮

今夔之永安門
即宮之遺址

千古陵谷變故宮安得存徘徊問耆老
惟有永安門遊人雜楚蜀車馬晚喧喧
不見重樓好誰知昔日尊吁嗟蜀先主
兵敗此亡魂只應法正死使公去遭燔

八陣磧

平沙何茫茫髣髴見石薊縱橫滿江上歲歲沙水齧孔
明死已久誰復辨行列神兵非學到自古不留訣至人
已心悟後世徒妄說自從漢道衰蜂起盡奸傑英雄不
相下禍難久連結驅民市無烟戰野江流血萬人賭一
擲殺盡如沃雪不為久遠計草草常無法孔明最後起
意欲掃羣孽崎嶇事節制隱忍久不決志大遂成迂歲
月去如瞥六師紛未整一旦英氣折唯餘八陣圖千古

壯夢峽

諸葛鹽井

井有十四自山下至山上其十三井常空盛夏水漲則鹽泉迤邐遷去常

去於江水之所不及

五行水本鹹安擇江與井如何不相入此意復誰省人心固難足物理偶相逞猶嫌取未多井上無閒綆

潁大夫廟

人情難強回天性可微感世人爭曲直苦語費搖撼大
夫言何柔暴主意自慘荒祠旁孤塚古隧有殘坎千年

惟茅焦世亦貴其膽不解此微言脫衣徒勇敢

許州西湖

西湖小雨晴灑灑春渠長來從古城角夜半傳新響使
君欲春遊浚治役千掌紛紜具畚鍤閤若蟻運壤天桃
弄春色生意寒猶快唯有落殘梅標格若矜爽遊人空
已集挈榼三且兩醉客卧道傍扶起尚偃仰池臺信宏
麗貴與民同賞但恐城市歡不知田野愴潁川七不登
野氣長蒼莽誰知萬里客湖上獨長想

江上值雪效歐陽體限不以鹽玉鶴鷺絮蝶飛
舞之類為比仍不使皓白潔素等字

縮頸夜眠如凍龜雪來唯有客先知江邊曉起浩無際
樹杪風多寒更吹青山有似少年子一夕變盡滄浪髭
方知陽氣在流水沙上盈尺江無漸隨風顛倒紛不擇
下滿坑谷高陵危江空野闊落不見入戶但覺輕絲絲
沾裳細看若刻鏤豈有一一天工為霍然一麾遍九野
吁此權柄誰執持世間苦樂知有幾今我幸免沾膚肌

山夫只見壓樵擔，豈知帶酒飄歌兒。天王臨軒喜有麥，
宰相獻壽嘉及時。凍吟書生筆欲折，夜織貧女寒無幃。
高人著屐踏冷冽，飄拂巾帽真仙姿。野僧斫路出門去，
寒液滿鼻清淋漓。洒袍入袖濕靴底，亦有執版趨堦墀。
舟中行客何所愛，願得獵騎當風披。草中咻咻有寒兔，
孤隼下擊千夫馳。猷冰煮鹿最可樂，我雖不飲強倒卮。
楚人自古好弋獵，誰能往者我欲隨。紛紜旋轉從滿面，
馬上操筆為賦之。

渚宮

渚宮寂寞依古郢楚地荒茫非故基二王臺閣已鹵莽

湘東王
高氏

何況遠問縱橫時楚王獵罷擊靈鼓猛士操舟

張水嬉釣魚不復數魚鼈大鼎千石烹蛟螭當時郢人

架宮殿意思絕妙般與倭飛樓百尺照湖水上有燕趙

千蛾眉臨風揚揚意自得長使宋玉作楚詞秦兵西來

取鐘簴故宮禾黍秋離離千年壯觀不可復今之存者

蓋已卑池空野迥樓閣小惟有深竹藏狐狸臺中絳帳

誰復見臺下野水

一作鴨

浮清漪綠牕朱戶春晝閒想見

深屋彈朱絲腐儒亦解愛聲色何用白首談孔姬沙泉
半涸草堂在破窻無紙風颼颼陳公蹤跡最未遠七瑞
寥落今何之百年人事知幾變直恐荒廢成空陂誰能
為我訪遺迹草中應有湘東碑

出峽

入峽喜巉崿出峽愛平曠吾心淡無累過境即安暢東
西徑千里勝處頗屢訪幽尋遠無厭高絕每先上前詩

尚遺略不錄久恐忘憶從巫廟回中路寒泉漲沒歸真
可愛翠碧光滿盞忽驚巫峽尾巖腹有穿壙仰見天蒼
蒼石室開南嚮宣尼古廟宇叢木作幃帳鐵插橫半空
俯瞰不計丈古人誰架構下有不測浪石竇見天圀瓦
棺悲古葬新灘阻風雪村落去携杖亦到龍馬溪茆屋
沾村釀玉虛悔不至實為舟人誑聞道石最奇寤寐見
怪狀峽山富奇偉得一知幾喪苦恨不知名歷歷但想
像今朝脫重險楚水渺平蕩魚多客庖足風順行意王

追思偶成篇聊助舟人唱

神女廟

大江從西來上有千仞山江山自環擁恢詭富神姦深

淵鼉鼉橫

去聲

巨壑蛇龍頑旌陽斬長蛟雷雨移蒼灣蜀

宇降老蹇至今帶連環縱橫若無主蕩逸侵入寰上帝

降瑤姬來處荆巫間神仙豈在猛玉座幽且閒飄蕭駕

風馭弭節朝天關倏忽巡四方不知道里艱古粧具法

服邃殿羅烟鬟百神自奔走雜沓來趨班雲興靈怪聚

雲散鬼神還茫茫夜潭靜皎皎秋月彎還應搖玉珮來
聽水潺潺

巫山

瞿塘迤邐盡巫峽崢嶸起連峯稍可怪石色變蒼翠天
工運神巧漸欲作奇偉塊軋勢方深結構意未遂旁觀
不暇瞬步步造幽邃蒼崖忽相逼絕壁凜可悸仰觀八
九頂俊爽凌顥氣晃蕩天宇高崩騰江水沸孤超兀不
讓直拔勇無畏攀緣見神宇憇坐就石位巉巖隔江波

一一問廟吏遙觀神女石綽約誠有以俯首見斜鬟拖
霞弄脩帔人心隨物變遠覺含深意野老笑吾旁少年
嘗屢至去隨猿孫上反以繩索試石笋倚孤峰突兀殊
不類世人喜神怪論說驚幼稚楚賦亦虛傳神仙安有
是次問掃壇竹云此今尚爾翠葉紛下垂婆娑綠鳳尾
風來自偃仰若為神物使絕頂有三碑詰曲古篆字老
人那解讀偶見不能記窮探到峰背採斫黃楊子黃楊
生石上堅瘦紋如綺貪心去不顧澗谷千尋絕山高虎

狼絕深入坦無忌洪濛草樹密葱蒨雲霞膩石竇有洪
泉甘滑如流髓終朝自盥漱冷冽清心胃浣衣掛樹梢
磨斧就石鼻徘徊雲日晚歸意念城市不到今十年衰
老筋力憊當時伐殘木牙蘗已如臂忽聞老人說終日
為嘆喟神仙固有之難在忘勢利貧賤爾何愛棄去如
脫屣嗟爾苦無還絕糧應不死

觀大水望朝陽巖作

朝陽巖前不結廬下眺江水百步餘春泉濺濺出乳竇

青莎白石半洿涂不到津頭二三日誰知江水漲天墟
遙望橫盃不敢濟巖口正有人冒魚

滄洲亭懷古

湘水悠悠天際來夾江古木抱山回城中人物若可數
日晏市散多蒼苔九嶷巉天古雲埋遙想帝子龍車迴
心衰目極何可望九歌寂寂令人哀

栢家渡

栢家渡西日欲落青山上下猿鳥樂欲因新月望吳雲

遙看北斗掛南嶽一夢惜惜四十秋
古人不死終未休
草舍蕭條誰與語香風欲過白蘋洲

清遠舟中寄耘老

小寒初渡梅花嶺萬壑千巖背人境
清遠聊為泛宅行
一夢分明墮鄉井覺來滿眼是湖山
鴨綠波搖鳳凰影
海陵居士無雲梯歲晚結廬潁水湄
山腰自懸蒼玉珮
野馬不受黃金羈門前車蓋獵獵走
笑倚清流數鬢絲
汀洲相見春風起白蘋吹花散烟水
萬里飄蓬未得歸

目斷滄浪淚如洗北雁南來遺素書苦言大浸沒我廬
清齋十日不燃鼎曲突往往巢龜魚今年玉粒賤如水
青銅欲買囊已虛人生百年如寄爾七十朱顏能有幾
有子休論賢與愚倪生枉却帶經鋤天南看取東坡叟
可是平生廢讀書

書堂嶼

蒼山古木書堂嶼北出湘水百餘步誰為往來虧世界
至今人指安禪處豈無驚蛇與飛鳥後來那復知其趣

不知我身今是否空記名稱作常住

醉睡者

有道難行不如醉有口難言不如睡先生醉卧此石間
萬古無人知此意

戲詠子舟畫兩竹兩鸚鵡

風晴日暖搖雙竹竹間對語雙鸚鵡鸚鵡之肉不可食
人生不才果為福子舟之筆利如鉅千變萬化皆天機
未知筆下鸚鵡語何似夢中蝴蝶飛

老翁井

井中老翁悞年華
白沙翠石公之家
公來無蹤去無跡
井面團圓水生花
翁今與世兩何與
無事紛紛驚牧豎
改顏易服與世同
無使世人知有翁

贈山谷子

黃童三尺世無雙
筆頭衮衮懸秋江
不憂老子難為父
平生崛強今心降
我來喜共阿戎語
應敵縱橫如急雨
生子還如孫仲謀
豚犬謾多何足數
黃家小兒名拾得

眉如長松眼如漆只今數歲已動人老人留眼看他日
笑君老蚌生明珠自笑此物吾家無君當置酒我當賀
有兒傳業更何須

觀子玉郎中草聖

柳侯運筆如電閃子雲寒悴羊欣儉百斛明珠便可扛
此書非我誰能雙

鰻魚行

漸臺人散長弓射初噉鰻魚人未識西陵衰老總帳空

肯向北河親饋食兩雄一律盜漢家嗜好亦若肩相差
食每對之先太息不因噎嘔緣瘡痂中間霸據關梁隔
一枚何啻千金直百年南北鮭菜通往往殘餘飽臧獲
東隨海舶號倭螺異方珍寶來更多磨沙淪瀋成大截
剖蚌作脯分餘波君不聞蓬萊閣下馳碁島八月邊風
備胡獠舶船跋浪鼉鼉震長鑱鏹處崖谷倒膳夫善治
薦華堂坐令雕俎生輝光肉芝石耳不足數醋芼魚皮
真倚墻中都貴人珍此味糟汜油藏能遠致割肥方厭

萬錢厨決皆可醒
千日醉三韓
使者金鼎來
方奩饋送
煩輿臺
遼東太守遠
自獻臨菑掾
吏誰為材
吾生東歸
收一斛包苴
未肯鑽華屋
分送羹材作
眼明却取細書
防老讀

次韻水官詩

并引

淨因大覺璉師以閭立本畫水官遺編禮公公既報之
以詩謂某汝亦作某頓首再拜次韻仍錄二詩為一卷
以獻

水官騎蒼龍龍行欲上天手攀時且住浩若乘風船不
知幾何長足尾猶在淵下有二從臣左右乘魚鼉雙鏢
相顧視風舉衣袂翻女子侍君側白頰垂雙鬟手執雉
尾扇容如未開蓮從者八九人非鬼非戎蠻出水未成
列先登揚旗殪長刀擁旁牌白羽注強弩雖服甲與裳
狀貌猶鯨鱣水獸不得從仰面以手扳空虛走雷霆雨
電晦九川風師黑虎囊面目昏塵烟翼從三神人萬里
朝天關我從大覺師得此詭怪編畫者古閩子于今三

百年見者誰不愛予者誠已難在我猶在子此理寧非
禪報之以好詞何必畫在前

老泉

高人豈學畫用筆乃其天譬如善游人一一能操船閫
子本逢掖疇昔慕雲淵丹青偶為戲染指初嘗龜愛之
不自己筆勢如風翻傳聞貞觀中左袵解椎鬟南夷羞
白雉佛國貢青蓮詔令擬王會別殿寫戎蠻熊冠金絡
額豹袖擁旛旌傳入應門內俯伏脫劍劒姿儼龍鳳
雜沓朝鵬鱣神功與絕跡後世兩莫扳自從李氏亡羣

盜竊山川長安三日火至寶隨飛烟尚有脫身者漂流
出東關三官豈容獨得此今已編吁嗟至神物會合當
有年京城諸權貴欲取百計難贈以玉如意豈能動高
禪信應一篇詩皎若畫在前

弔徐德占

并引

余初不識德占但聞其初為呂惠卿所薦以處士用元
豐五年三月偶以事至蘄水德占聞余在傳舍惠然見
訪與之語有過人者是歲十月聞其遇禍作詩弔之

美人種松栢欲使低映門栽培雖易長流惡病其根衰
哉歲寒姿骯髒誰與倫竟為明所悞不免刀斧痕一遭
兒女汚始覺山林尊從來覓棟梁未免傍籬藩南山隔
秦嶺千樹龍蛇奔大屢若果傾萬牛何足言不然老巖
壑合抱枝生孫死者不可悔吾將遺後昆

題李伯時淵明東籬圖

彼哉嵇阮曹終以明自膏靖節固昭曠歸來侶蓬蒿新
霜著疎柳大風起江濤東籬理黃華意不在芳醪白衣

挈壺至徑醉還遊遨悠然見南山意與秋氣高

李白謫仙詩

我居青空裏君隱黃埃中聲形不相弔心事難形容欲
乘明月光訪君開素懷天盃飲清露展翼登蓬萊佳人
持玉尺度君多少才玉尺不可盡君才無時休對面一
笑語共躡金鰲頭絳宮樓闕百千仞霞衣誰與雲烟浮
數日前夢一僧出二鏡求詩僧以鏡置日中其

影甚異其一如芭蕉其一如蓮花夢中與作

詩

君家有二鏡光景如湛盧或長如芭蕉或圓如芙蕖飛
電着子壁明月入我廬月下合三壁日月跳明珠問子
是非我我是非文殊

飲酒四首

我觀人間世無如醉中真虛空為銷殞况乃百憂身惜
哉知此晚坐令華髮新聖人驟難得日且致賢人
左手持蟹螯舉觴囑雲漢天生此神物為我洗憂患山

川同恍惚魚鳥共蕭散客至壺自傾欲去不得閒
有客遠方來酌我一甌茗我醉方不啜強啜忽復醒既
鑿渾沌氏遂遠華胥境操戈逐儒生舉觴還酹酊
雷觴淡於水經年不濡唇爰有擾龍裔為造英靈春英
靈韻甚高蒲萄難與鄰他年血食汝當配杜康神

大雪獨留尉氏

古驛無人雪滿庭有客冒雪來自北紛紛笠上已盈寸
下馬登堂面蒼黑苦寒有酒不能飲見之何必問相識

我酌徐徐不滿觥看客倒盡不留濕千門晝閉行路絕
相與笑語不知夕醉中不復問姓名上馬忽去橫短策

阮籍嘯臺

在尉氏

阮生古狂達遁世默無言猶餘胸中氣長嘯獨軒軒高
情遺萬物不與世俗論登臨偶自寫激越蕩乾坤醒為
嘯所發飲為醉所昏誰能與之較亂世足自存

留別叔通元弼坦夫

田三昔同寮向我每傾倒當年或齟齬反覆看愈好冠

三我部民孝悌化鄰保有如袁伯業苦學到衰老石生
吾邑子勁立風中草宦遊甌生塵菽水媚翁媪我窮交
舊絕計拙集枯槁三子尤見存往復紛紜縞迎我淮水
北送我睢陽道願存金石契凜凜貫華皓

余歸自道場何山遇大風因憇耘老溪亭命官
奴秉燭捧硯寫風竹一枝題詩云

更將掀舞勢把燭畫風篠美人為破顏憐此腰肢裊

和寄天選長官

寓形宇宙間，佚我方以老。流光安足恃，百歲同過鳥。頃
子縈網羅，文采緣自表。自古山林人，何曾識機巧。但記
寒巖翁，論心秋月皎。黃香十年舊，禪學衆衆妙。虛懷養
天和，肯狗奔走闢官居。職事理晨起，何用早桐陰。滿西
齋，叱吏供灑掃。眷予東南來，野飯煮芹蓼。葆光既清尚，
令尹亦高蹈。相將古寺行，軟語頽晚照。公家有畸人，
族人隱虛緣能自保。卜築嵩山陽，何一作當從結好中。
嵩山山饒勝景一覽未易飽。何時命巾車，共陟雲外嶠。翻然

一作思

筋力疲不復追踴跳公詩擬南山雄拔千丈峭形
容逼天真邂逅識其要藩籬吾未窺敢議窮閭與

昭陵六馬唐文皇戰馬也琢石象之立昭陵前
客有持此石本示予為賦之

天將剗隋亂帝遣六龍來森然風雲姿颯爽毛骨開
颺馳不及視山川儼莫回長鳴視八表擾擾萬駑駘秦王
龍鳳姿魯鳥不足摧腰間大白羽中物如風雷區區數
豎子搏取若提孩手持掃天帚六合如塵埃艱難濟大

業一一非常才維時六驥足績與英衛陪功成鏘八鸞
玉輅行天街荒涼昭陵闕古石埋蒼苔

顏闔

顏闔古有道躬耕自衣食區區魯小邦不足隱明德輅
軒來我門聘幣繼金璧山門應使者耕稼不謀國但疑
誤將命非敢憚行役使者反錫命戶庭空履迹薄俗狗
世榮截趾履之適所重易所輕隋珠彈飛翼伊人畏照
影獨往就陰息鼎俎薦忠賢誰能死燔炙念彼藏皮冠

安知獲堯客

送朱世昌使蜀七首

藹藹青城雲娟娟峨眉月隨我西北來照我光不滅
我在塵土中白雲呼我歸我游江湖上明月濕我衣
岷峨天一方雲月在我側謂是山中人相望了不隔
夢尋西南路默數長短亭似聞嘉陵江跳波吹枕屏
送君無一物清江飲君馬路穿慈竹林父老拜馬下
不用驚去裝使者我友生聽訟如家人細說為汝評

若逢山中友問我歸何日為話腰腳輕猶堪弄泉石

贈狄崇班季子

狄生臂鷹來見客不會揖踞床啗得雋借筋數禽入短
後掬豹裘猶濺猩血濕指呼索酒嘗快把長鯨吸半酣
論刀槊怒髮欲起立北方老獅子狂妄尚不繫要須此
慄悍氣壓邊烽急夜走追鋒車生斬活離級持歸獻天
王封侯穩可拾何為走獵師日使羣毛泣

題盧鴻學士堂圖

昔為太室花盧巖在東麓直上登封壇一夜蠶生足徑
歸不復往蠻壑空在目安知有千老舒卷不盈軸一處
一盧生裘褐蔭喬木方為世外人行止何須錄百年入
篋笥大馬同一束嗟予縛世累歸未有茆屋江千百畝
田清泉映脩竹尚欲逃世名豈須上圖軸

寄周安孺茶

大哉天宇內植物知幾族靈品獨標奇迥超凡草木名
從姬旦始漸播桐君錄賦詠誰最先厥傳惟杜育唐人

未知好論著始於陸常李亦清流當年慕高躅遂使天下士嗜此偶於俗豈但中土珍蕪之異邦鬻鹿門有佳士博覽無不矚邂逅天隨翁篇章互賡續開園頤山下屏跡松江曲有興即揮毫燦然存簡牘伊予素寡愛嗜好本不篤粵自少年時低回客京輶雖非曳裾者庇蔭或華屋頗見綺紈中齒牙厭梁肉小龍得屢試糞土視珠玉團鳳與葵花砭砭雜魚目貴人自矜惜捧玩且緘積未數日注卑定知雙井辱於茲自研討至味識五六

自爾入江湖尋僧訪幽獨高人固多暇探究亦頗熟聞
道早春時攜簞赴初旭驚雷未破蕾采采不盈掬旋洗
玉泉蒸芳馨豈停宿須臾布輕縷火候謹盈縮不憚頃
間勞經時廢藏蓄髣髴筒淨無染箸籠勻且複苦畏梅潤
侵暖須人氣煥有如剛耿性不受纖芥觸又若廉夫心
難將微穢瀆晴天敞虛府石碾破輕綠永日遇閒賓乳
泉發新馥香濃奪蘭露色嫩欺秋菊閩俗競傳誇豐腴
面如粥自云葉家白頗勝中山醪好是一杯深午牕春

睡足清風擊兩腋去欲凌鴻鵠嗟我樂何深水經亦屢
讀子咤中冷泉次乃康王谷癖培頃魯嘗瓶罌走僮僕
如今老且懶細事百不欲美惡兩俱忘誰能強追逐薑
鹽拌白土稍稍從吾蜀尚欲外形體安能徇心腹由來
薄滋味日飯止脫粟外慕既已矣胡為此羈束昨日散
幽步偶上天峰麓山圃正春風蒙茸萬旗簇呼兒為佳
客採製聊亦復地僻誰我從包藏置厨麓何嘗較優劣
但喜破睡速況此夏日長人間正炎毒幽人無一事午

飯飽蔬菽困卧北牕風風微動牕竹乳甌十分滿人世
真局促意爽飄欲仙頭輕快如沐昔人固多癖我癖良
可贖為問劉伯倫胡然枕糟麴

余自城中還道中雲氣自山中來如羣馬奔突
以手掇開籠收其中歸家雲盈籠開而放之
作攬雲篇

物役會有時星言從高駕道逢南山雲歛吸如電過竟
誰使令之袞袞從空下龍移相排拶鳳舞或頽亞散為

東郊霧凍作枯樹稼或飛入吾車偈仄人肘膊搏取置
笥中提携反茅舍開緘乃放之掣去仍變化雲兮汝歸
山無使達官怕

游山呈通判承議寫寄參寥師

煌煌世胄餘夫子非碌碌由來有詩書所以能絕俗得
官本河朔瓜期未易促扁舟下南來逸駕追鳴鵠遇勝
即徜徉風餐蕪露宿嗟予偶傾蓋一笑外羈束杖策每
過從相携訪山谷東風披鮮雲繡錯出林麓松門有時

盡幽景無斷續崖轉聞鐘聲林疎見華屋銜山餘落景
歸迹猶躑躅誰云鄴下歡往事不可復吾曹二三事取
樂亦云足願公寄新詩一一能見錄船頭行北歸囊橐
有美玉塵埃京洛人亦與洗心目

和郭功父韻送芝道人游隱靜

觀音妙智力應感隨緣度芝師訪東坡寧辭萬里步道
義偶相契十年同去住行窮半世間又欲浮盃渡我願
焚囊鉢不作陳俗具會取却歸時只是而今路

次韻魯直戲贈

昨夜試微涼，汗衾初退紅。
我願隨秋風，隨身入房櫳。
君王不好事，只作好驚鴻。
細看卷蠅尾，我家真栗蓬。

夜坐與邁聯句

清風來無邊，明月翳復吐。
自松聲滿虛空，竹影侵半戶。

邁暗枝有驚鵲，壞壁鳴饑鼠。
自露葉耿高梧，風螢落空

廡。
邁微涼感團扇，古意歌白紵。
自樂哉今夕游，復此陪

杖屨。
邁傳家詩律細，已自過宗武。
短詩膝上成，聊以慰

懷祖自

寄傲軒

先生英妙年一掃千兔禿仕進固有餘不肯踐場屋通
闡何所傲傲名非傲俗定知軒冕中享榮不償辱豈無
自安計得失猶轉轂先生獨揚揚憂患莫能瀆得如虎
挾乙失若龜藏六茅簷聊寄寓俛仰亦自足東坡無邊
春方寸盡藏蓄醉哦傍若無獨侑一樽醪床頭車馬道
殘月掛疎木朝客紛擾時先生睡方熟

榆

我行汴堤上，厭見榆陰綠。
千株不盈畝，斬伐同一束。
及居幽囚中，亦復見此木。
蠹皮溜秋雨，病葉埋牆曲。
誰言霜雪苦，生意殊未足。
坐待春風至，飛英覆空屋。

槐

憶我初來時，草木向衰歇。
高槐雖經秋，晚蟬猶抱葉。
淹留未云幾，離離見疎筴。
栖鴉寒不去，哀叫飽啄雪。
破巢帶空枝，疎影掛殘月。
豈無兩翅羽，伴我此愁絕。

竹

今日南風來吹亂庭前竹低昂中音會甲刃紛相觸蕭
然風雪意可折不可辱風霽竹已一作亦回猗猗散青玉
故山今何有秋雨荒籬菊此君知健否歸掃南軒綠

栢

故園多珍木翠栢如蒲葦幽囚無與樂百日看不已時

來拾流膠

一作肘

未忍踐落子當年誰所種少長與我齒

仰視蒼蒼榦所閱固多矣應見李將軍膽落溫御史

東坡全集卷二十七

欽定四庫全書

東坡全集卷二十八

宋 蘇軾 撰

詩一百十首

問淵明

或曰東坡此詩與淵明反此非知言也
蓋亦相引以造意言者未始相非也元

祐五年
十月日

子知神非形何復異人天豈惟三才中所在靡不然我
引而高之則為星斗懸我散而卑之寧非山與川三皇
雖云沒至今在我前八百要有終彭祖非永年皇皇謀

一醉發此露槿妍有酒不辭醉無酒斯飲泉立善求我
譽饑人食饒涎委運憂傷生憂一作運去生亦還縱浪大
化中正為化所纏應盡便須盡寧復事此言

題雲龍草堂石磬

折為督郵腰懸作山人室殊非濮上音信是泗濱石

朱亥墓

昔日朱公子雄豪不可追今來遊故國大塚屈稱兒平
日輕公相千金棄若遺梁人不好事名字寄當時魯史

盜齊豹求名誰復知
慎無怨世俗猶不遭仲尼

嚴顏碑

先主反劉璋兵意頗不義孔明古豪傑何乃為此事劉
璋固庸主誰為死不二嚴子獨何賢談笑傲碓兀國亡
君已執嗟子死誰為何人刻山石使我空涕淚吁嗟斷
頭將千古為病悖

峴山

遠客來自南游塵昏峴首過關無百步曠蕩吞楚數登

高忽惆悵千載意有偶所憂誰復知嗟我生苦後團團
山上檜歲歲閱榆柳大才固已殊安得同永久可憐山
前客倏忽星過雷賢愚未及分來者當自剖

驪山

君門如天深幾重君王如帝坐法官人生難處是安穩
何為來此驪山中複道凌雲接金闕樓觀隱煙橫翠空
林深霧暗迷八駿朝東暮西勞六龍六龍西幸峨眉棧
悲風便入華清院霓裳蕭散羽衣空麋鹿來游猿鶴怨

我上朝元春半老滿地落花無人掃羯鼓樓高掛夕陽
長生殿古生青草可憐吳楚兩鹽雞築臺未就已堪悲
長楊五柝漢幸免江都樓成隋自迷由來留連多喪國
晏安酖毒因奢惑三風十愆古所戒不必驪山可亡國

和子由除日見寄

薄官驅我西遠別不容惜方愁後會遠未暇憂歲夕強
歡雖有酒冷酌不成席秦烹惟羊羹隴饌有熊腊念為
兒童歲屈指已成昔往事今何追忽若箭已釋感時嗟

事變所得不償失府卒來驅讎矍鑠驚遠客愁來豈有
魔煩汝為攘礫寒梅與凍杏嫩萼初似麥攀條為惆悵
玉蕊何時拆不憂春豔晚行見棄夏敷人生行樂耳安
用聲名藉胡為獨多感不見膏自炙詩來苦相寬子意
遠可射依依見其面疑子在咫尺兄今雖小官幸忝佐
方伯北池近所鑿中有汧水碧臨池飲美酒尚可消永
日但恐詩力弱鬪健未免馘詩成十日到誰謂千里隔
一月寄一篇憂愁何足擲

過巴東縣不泊聞頗有萊公遺迹

萊公昔未遇寂寞在巴東聞道山中樹猶餘手種松江
山養豪俊禮數困英雄執版迎官長趨塵拜下風當年
誰刺史應未識三公

白帝廟

朔風催入峽慘慘去何之共指蒼山路來朝白帝祠荒
城秋草滿古樹野藤垂浩蕩荆江遠淒涼蜀客悲遲回
問風俗涕泗閔興衰故國依然在遺民豈復知一方稱

警蹕萬乘擁旌旗遠畧初吞漢雄心豈在夔崎嶇來野
廟閔默愧常時破甑蒸山麥長歌唱竹枝荆邯真壯士
吳柱本經師失計雖無及圖王固已奇君餘帝王號皎
皎在門楣

戎州

亂山圍古郡市易帶羣蠻庾嶺春耕少孤城夜漏閒往
時邊有警征馬去無還自頃方從化年來亦款關頗能
貪漢布但未脫金鑲何足爭強弱吾民盡玉顏

孔周翰嘗令仙源中秋以事留東武時陳君榮右
王君建中皆在郡後十七年中秋周翰持節過
郡二君已亡感時懷舊留詩於壁又五年中秋
軾與客飲超然臺聞周翰乞此郡客有誦其詩
者乃次其韻二篇以為他日一笑

屈指從來十七年交情零落一潛然
嬋娟再見中秋月

依舊清輝照客眠

右孔

壞壁題詩已五年故人風物兩依然
定知來歲中秋月

又照先生枕麴眠

更邀明月說明年
記取孤吟孟浩然
此去官遊如傳舍
揀枝驚鵲幾時眠

獲果莊二十二韻

青唐有逋寇
白首已窮妖
竊據臨洮郡
潛通講渚橋
廟謀周召虎
邊帥漢班超
堅壘千兵破
連航一炬燒
擒姦從窟穴
奏捷上煙霄
詭異人圖像
驩娛路載謠
誅非一事伐
叛自先朝
取道經陵寢
前期告廟祧
西來聞幾

日面縛見今朝二聖臨雲陞千官溢海潮載囚車輶輶
失主馬蕭條橫拜如蹲犬胡裝尚衣貂理卿辭具服譯
長舌初調緩死恩殊厚求生尾屢搖慈仁逢太母寬厚
戴唐堯赤手真擒虎和羹未賜臬藁街虛授首東市偶
全腰困獸何須殺遺雖或可招威聲西振夏武節北通
遼帝道有強弱天時或長消羌情防報復軍勝忌矜驕
慎重關西將奇功勿再要

光祿庵二首

文章恨不見文園禮樂方將訪石泉何事庵中著光祿
枉教閒處筆如椽

城中太守的何人林下先生非我身若向庵中覓光祿
雪中履迹鏡中真

過木樨觀

石壁高千尺微蹤遠欲無飛簷如劒寺

出劒門東望上寺宇彷彿可見

古栢似仙都許子嘗高遁行舟悔不迂斬蛟聞猛烈提
劒想崎嶇寂寞棺猶在脩崇世已愚隱居人不識化去

俗爭吁洞府煙霞遠人間
爪髮枯飄飄乘倒景誰復顧
遺軀

觀開西湖次吳左丞韻

偉人謀議不求多事定紛紛
自唯阿盡放龜魚還綠淨
肯容蕭葦障前坡一朝美事誰能紀
百尺蒼崖尚可磨
天上列星當亦喜月明時下浴明波

荊州十首

遊人出三峽楚地盡平川
北客隨南賈吳檣間蜀船
江

侵平野斷風捲白沙旋欲問興亡意重城自古堅

南方舊戰國慘澹意猶存慷慨因劉表淒涼為屈原廢
城猶帶井古姓聚成村亦解觀形勝昇平不敢論

楚地闊無邊蒼茫萬頃連耕牛未嘗汗投種去如捐農
事誰當勸民愚亦可憐平生事遊惰那得怨凶年

朱檻城東角高王此望沙江山非一國烽火畏三巴戰
骨淪秋草危樓倚斷霞百年豪傑盡擾擾見魚蝦

沙頭煙漠漠來往厭喧卑野市分麋開官帆過渡遲遊

人多問卜僴叟盡携龜日暮江天靜無人唱楚詞

太守王夫子山東老俊髦壯年聞猛烈白首見雄豪食
雁君應厭驅車我正勞中書有安石慎勿賦離騷

殘臘多風雪荆人重歲時客心何草草里巷自嬉嬉爆
竹驚鄰鬼驅儼逐小兒故人應念我相望各天涯

江水深成窟潛魚大似犀赤鱗如琥珀老枕勝玻璃上
客舉雕俎佳人搖翠篋登庖更作器何以免屠割

北雁來南國依依似旅人縱橫遭折翼感惻為沾巾平

日誰能挹高飛不可馴故人持贈我三嗅若為珍

柳門京國道驅馬及春陽野火燒枯草東風動綠芒
此行連許鄧南去極衡湘楚境橫天下懷王信弱王

渝州寄王道祖

曾聞五月到渝州水泊長亭砌下流唯有夢魂長繚繞
莫論唐史更綢繆舟經故國歲時改霜落寒江波浪收
歸夢不成冬夜永厭聞船上報更籌

過安樂山聞山上木葉有文如道士篆符云此

山乃張道陵所寓二首

天師化去知何在玉印相傳世共珍
故國子孫今尚死滿山秋葉豈能神

真人已不死外慕墮空虛猶餘好名意
滿樹寫天書

涪州得山胡

善鳴出
黔中

終日鎖筠籠回頭惜翠茸誰知聲嘒嘒
亦自意重重夜宿烟生浦朝鳴日上峯
故巢何足戀鷹隼豈能容

巫山廟上下數十里有烏鳶無數取食於行舟

之上舟人神之故亦不敢害

羣飛來去噪行人得食無憂便可馴江上饑鳥無足怪
野鷹何事亦頻頻

夷陵縣歐陽永叔至喜堂

夷陵雖小邑自古控荆吳形勝今無用英雄久已無誰
知有文伯遠謫自王都人去年年改堂傾歲歲扶追思
猶咎呂感歎亦憐朱

時朱太守為公築此堂

舊種孤楠老新霜一

橘枯清篇留峽洞醉墨寫邦圖

三游洞有詩夷陵圖後有留題處

故老

問行客長官今白鬚著書多念慮許國減歡娛寄語公
知否還須數倒壺

入峽

自昔懷幽賞今茲得縱探長江連楚蜀萬派瀉東南合
水來如電黔波綠似藍餘流細不數遠勢競相參入峽
初無路連山忽似龕紫迂收浩渺蹙縮作淵潭風過如
呼吸雲生似吐含墜崖鳴窅窅垂蔓綠穆穆冷翠多巉
竹孤生有石楠飛泉飄亂雪怪石走驚驂絕澗知深淺

樵童忽兩三人言偶逢郭沙岸可乘籃野戍荒州縣邦
君古子男放衙鳴晚鼓留客薦霜柑聞道黃精草叢生
綠玉簪盡應充食飲不見有彭聃氣候冬猶暖星河夜
半涵遺民悲昶衍

孟昶從此入觀
王衍亦蜀主

舊俗接魚蠹版屋漫

無瓦嵒居窄似庵伐薪常冒嶮得米不盈甌歎息生何
陋劬勞不自慙葉舟輕遠沂大浪固嘗諳矍鑠空相視
嘔啞莫與談蠻荒安可駐幽邃信難舛獨愛孤棲鷗高
超百尺嵐橫飛應自得遠颺似無貪振翮游霄漢無心

顧雀鵲塵勞世方病局束我何堪盡解林泉好多為富
貴酣試看飛鳥樂高適此心甘

題贈田辨之琴姬

流水隨絃滑清風入指寒坐中有狂客莫近繡簾彈

四十年前元夕與故人夜遊得此句

午夜朧朧淡月黃夢回猶有暗塵香縱橫滿地霜槐影
寂寞蓮燈半在亡

戲孫公素

投扇昔年笑溫嶠握刀晚歲戰劉郎
不須戚戚如馮衍
便與時時說李陽

南康望湖亭

一本云
過洞庭

八月渡長湖蕭條萬象疎

一本云滿
湘景物疎

秋風片帆急暮靄

一本
作雨

一山孤許國心猶在康時術已虛

一作術
一作業

岷峨家萬

里投老得歸無

半山亭

登嶺勢巍巍蓮峯太華齊
凭欄紅日早回首白雲低
松

拍月中老猿猴物外啼禪師吟絕後千古指人迷

儋耳山

突兀隘空虛他山總不如君看道傍石盡是補天餘

次韻聞後上人

前身本同社宿業獨臨邊一悟鏡空老始知圓澤賢歸
心忘攢佩生術寄羊鞭不似歐陽子空留六一泉

宋復古畫瀟湘晚景圖三首

西征憶南國堂上畫瀟湘照眼雲山出浮空野水長舊

游心自省信手筆都忘會有衡陽客來看意渺茫

落落君懷抱山川自屈蟠經營初有適揮洒不應難江
市人家少烟村古木攢知君有幽意細細為尋看

咫尺殊非少陰晴自不齊徑蟠趨後崦水會赴前溪自
說非人意曾經是馬蹄他年宦遊處應話劔山西

儋州二首

小邑浮橋外青山石岸東茶槍燒後出麥浪水前空萬
戶不禁酒三年真識翁結茅來此住歲晚有誰同

荔子幾時熟花頭今已繁探春先揀樹買夏欲論園居

士常携客叅軍許扣門

周叅軍家
多荔子

明年更有味懷抱開

諸孫

一云帶
諸孫

海上道人傳以神守氣訣

但向起時作還於作處收蛟龍莫放睡雷雨直須休要
會無窮火嘗觀未盡油夜深人散後惟有一燈留

曹溪夜觀傳燈錄燈花落一僧字上口占

山堂夜岑寂燈下看傳燈不覺燈花落茶毗一個僧

贈包安靜先生三首

皓色生甌面堪稱雪見羞東坡調詩腹今夜睡應休

偶謁

大中精藍中故人烹日注
茶果不虛示故詩以記之

建茶三十片不審味如何奉贈色居士僧房戰睡魔

昨日

點日注極佳點此復云罐中
餘者可示及舟中滌神耳

野菜初出珍又珍送與安靜病酒人便須起來和熱喫
不消洗面裹頭巾

杭州次周燾韻遊天竺觀激水

道眼轉丹青常於寂處鳴早知雨是水不作兩般聲

過海得子由書

經過廢來久有弟忽相求門外三竿日江闕一葉秋蕭疎悲白髮漫浪散窮愁世事江聲外吾生幸且休

去歲與子野遊逍遙堂日欲沒因並西山叩羅浮道院至已二鼓矣遂宿于西堂今歲索居僭耳子野復來相見作詩贈之

往歲追歡地寒牕夢不成笑談驚半夜風雨暗長檠鷄

唱山椒曉鐘鳴霜外聲只今那復見髣髴似三生

元祐五年十二月十二日同景文義伯聖途次

元伯固仲蒙游七寶寺題竹上

結根豈殊衆脩柯獨出林孤高不可恃歲晚霜風侵

泗州過倉中劉景文老兄戲贈一絕

既聚伏波米還數魏舒籌應笑蘇夫子僥倖得湖州

戲題巫山縣用杜子美韻

巴俗深留客吳儂但憶歸直知難共語不是故相違東

縣聞銅臭江陵換袂衣丁寧巫峽雨慎莫暗朝暉

初貶英州過杞贈馬夢得

萬古他池穴歸心負雪堂殷勤竹林詠猶得比山王

荅晁以道索書

閱世真難記如公自不忘其於書太簡正以懶相妨

大老寺竹間閣子

殘花帶葉暗新筍出林香但見竹陰綠不知汧水黃樹
高傾隴鳥池浚落河魴栽種良辛苦孤僧瘦欲甦

和廬山上人竹軒

洞外復空中
千千萬萬同
勞師內竹
頌清是阿
誰風

款塞來享

蠡爾氏羌國
天誅亦久稽
既能知面內
不復議征西
斥堠銷烽火
邊城息鼓鼙
輸忠脩貢職
棄過為黔黎
雪滿流沙靜
雲沉太白低
巍巍二聖治
盛德古難齊

觀臺

三界無所住
一臺聊自寧
塵勞付白骨
寂照起黃庭
殘

磬風中嫋孤燈雪後青須防童子戲投瓦犯清冷

吳江岸

曉色兼秋色蟬聲雜鳥聲壯懷銷鑠盡回首尚心驚

嘲子由

堆几盡埃簡攻之如蠹蟲誰知聖人意不在古書中

無題

六秩行當啟區中緣更疎不貪為我寶安步當君車故
國多喬木先人有弊廬誓將閒散好不著一行書

元祐九年立春

熊白來山北猪紅削劍南
春盤得青韭臘酒寄黃柑

扶風天和寺

遠望若可愛朱欄碧瓦溝
聊為一駐足且慰百回頭
水落見山石塵高昏市樓
臨風莫長嘯遺涕浩難收

再贈常州報恩長老

薦福老懷真巧便淨慈兩本更尖新
憑師為作鐵門限
準備人間請話人

聞洮西捷報

漢家將軍一丈佛，詔賜天池八尺龍。
露布朝馳玉關塞，捷書夜到甘泉宮。
似聞指揮築上郡，已覺談笑無西戎。
牧臣不見天顏喜，但驚草木放一作皆春容。

三萼牡丹

風雨何年別，留真向此邦。
至今遺恨在，巧過不成雙。

已未十月十五日獄中恭聞太皇太后不豫有

赦作詩

庭柏陰陰晝掩門
烏知有赦開
黃昏漢宮自種三生福
楚客還招九死魂
縱有鋤犁及田畝
已無面目見丘園
只應聖主如堯舜
猶許先生作正言

題李景元畫

聞說神仙郭恕先
醉中狂筆勢瀾翻
百年寥落何人在
只有華亭李景元

謝人惠雲巾方舄二首

燕尾稱呼理未便
剪裁雲葉却天然
無心只是青山物

覆頂宜歸紫府仙轉覺周家新樣俗

頭巾起後周

未容陶令

舊名傳鹿門佳士勤相贈黑霧玄霜合比肩

皮襲美贈天隨子紗

中詩云掩微乍疑裁黑霧輕明渾似帶玄霜

胡韉短勒格龔疎古雅無如此樣殊妙手不勞盤作鳳

晉永嘉中有鳳頭鞋

輕身只欲化為鳬魏風褊儉堪羞葛楚客豪

華可笑珠擬學梁家名解脫

武帝作解脫履

便於禪坐作跣趺

謝宋漢傑惠李承晏墨

老松燒盡結輕花妙法來從北李家翠色冷光何所似

墻東鬢髮墮寒鴉

被命南遷塗中寄定武同僚

人事千頭及萬頭得時何喜失時憂只知紫綬三公貴
不覺黃粱一夢遊適見恩綸臨定武忽遭分職赴英州
南行若到江干側休宿潯陽舊酒樓

李委吹笛

并引

元符五年十二月十九日東坡生日也置酒赤壁磯下
踞高峰俯鵲巢酒酣笛聲起於江上客有郭石二生頗

知音謂坡曰笛聲有新意非俗工也使人問之則進士
李委聞坡生日作新曲曰鶴南飛以獻呼之使前則青
巾紫裘要笛而已既奏新曲又快作數弄嘹然有穿雲
裂石之聲坐客皆引滿醉倒委袖出嘉紙一幅曰吾無
求於公得一絕句足矣坡笑而從之

山頭孤鶴向南飛
載我南遊到九嶷
下界何人也吹笛
可憐時復犯龜茲

書黃筌畫翎毛花蝶圖二首

短翎長喙喜喧卑
曳練雙翔亦自奇
賴有黃鸝鬪嬛好
獨依蘚石立多時

綠陰青子已愁人
忍見中庭燕麥新
惆悵劉郎今白首
時來看卷覓餘春

次韻王定國得晉卿酒相留夜飲

短衫壓手氣橫秋
更著仙人紫綺裘
使我有名全是酒
從他作病且忘憂
詩無定律君應將
醉有真鄉我可侯
且倒餘樽盡今夕
睡蛇已死不須鉤

偶於龍井辨才處得歛硯甚奇作小詩

羅細無文角浪平
半九犀壁浦雲泓
午牕睡起人初靜
時聽西風拉瑟聲

秋晚客興

草滿池塘霜送梅
疎林野色近樓臺
天圍故越侵雲盡
潮上孤城帶月迴
客夢冷隨楓葉斷
愁心低逐雁聲來
流年又喜經重九
可意黃花是處開

陳伯比和回字復次韻

下里馮生寧屑去湖海陳侯猶肯來詩書好在家四壁
蒲柳蓊然城一隈騎上下山亦疎矣儵從容出何為哉
市橋十步即塵土晚雨瀟瀟殊未回

廣陵後園題申公扇子

露葉風枝曉自勻綠陰青子淨無塵閒吟遠屋扶疎句
須信淵明是可人

山光寺回次芝上人韻

闌裏清遊借隙光醉時真境發天藏夢回拾得吹來句

十里南風草木香

與道源遊西莊遇齊道人同往草堂為齊書此
桑麻已零落藻荇復銷沉園宅在人境歲時傷我心
穿南埭路遙望北山岑欲與道人語跨鞍聊一尋

寒食夜

漏聲透入碧牕紗人靜鞦韆影半斜
沉麝不燒金鴨冷
淡雲籠月照梨花

荅子勉三首

君不登郎省還應上諫坡才高殊未識歲晚幸無他
馬羸難出鄰雞凍不歌寒爐餘幾火灰裏撥陰何

驚人得佳句或以傲王公處士還清節滑稽安足雄
深沉似康樂簡遠到安豐一點無俗氣相期林下風

欲舞腰身抑一窠小梅催拍大梅歌舞餘片片梨花落
爭奈當塗風物何

送楊奉禮

譜牒推闡右風流出靖恭時情任險陂家法故雍容南

去河千頃

大水中
相別

餘惟酒一鍾更誰哀老子今得放疎

慵

別東武流杯

莫笑官居如傳舍故應人世等浮雲百年父老知誰在
唯有雙松識使君

走筆謝呂行甫惠子魚

臥沙細肋吾方厭通印長魚誰肯分好事東平貴公子
貴人不與與蘇君

訪詹使君食槐芽

一作葉

冷淘

枇杷已熟粲金珠
桑落初嘗滌玉蛆
暫借垂蓮十分盞
來澆空腹五車書
青浮卯盞槐芽餅
紅點冰盤藿葉魚
醉飽高眠真事業
此生有味在三餘

贈虔州慈雲寺鑒老

居士無塵堪洗沐
道人有句借宣揚
牕間但見蠅鑽紙
門外唯聞佛放光
徧界難藏真薄相
一絲不掛且逢場
却須重說圓通偈
千眼薰籠是法王

和方南圭寄近周文之三首

共惜相從一寸陰，酒盃雖淺意殊深。且同月下三人影，

聊豁

一作莫作

天涯萬里心。東嶺舊

一作近

開松竹徑，南堂初

絕斧斤音。知君善頌如張老，猶望携壺更一臨。

數畝蓬蒿古縣陰，小牕明快夜堂深。也知卜築非真宅，

聊欲跣趺看此心。聞道携壺問奇字，更宜登木助徽音。

一云振履出商音

相娛比戶江千頃，直下都無地可臨。

此生真欲老墻陰，却掃都忘歲月深。拔薤已觀賢守政，

摘蔬聊慰故人心風流賀監常吳語憔悴鍾儀獨楚音
治狀兩邦俱第一潁川歸去肯重臨

壺中九華詩

并引

湖口人李正臣蓄異石九峰玲瓏宛轉若牕櫺然余欲
以百金買之與仇池石為偶方南遷未暇也名之曰壺
中九華且以詩識之

我家岷蜀最高峰

一作清溪電
轉失雲峯

夢裏猶驚翠掃空五嶺

莫愁千嶂外九華今在一壺中天池水落層層見

一作
石泉

影落涓涓

玉女牕明處處通念我仇池太孤絕百金歸買

小

一作碧

玲瓏

留別登州舉人

身世相忘久自知此行閒看古黃陂自非北海孔文舉
誰識東萊太史慈落筆已吞雲夢客抱寒欲訪水仙師
莫嫌五日忽忽守歸去先傳樂職詩

過海

又見二
十五卷

參橫斗落轉

一作轉欲

三更苦雨終風也解晴雲散月明誰

點綴天宮海色本澄清空餘魯叟乘桴意無復

一作粗識軒

皇奏樂聲九死南荒吾不恨茲游奇絕冠平生

過嶺寄子由三首

七年來往我何堪又試曹溪一勺甘夢裏似曾遷海外
醉中不覺到江南波生濯足鳴空澗霧遶征衣滴翠嵐
誰遣山鷄忽驚起半巖花雨落毳毼

投章獻策謾多談能雪冤忠死亦甘一片丹心天日下
數行清淚嶺雲南光榮歸佩呈佳瑞瘴癘幽居弄晚嵐

從此西風庾梅謝却迎誰與馬毳毼

山林瘴霧老難堪歸去中原茶亦甘有命誰憐終反北
無心却笑亦巢南蠻音慣習疑僮語脾病縈纏帶嶺嵐
賴有祖師清淨水塵埃一洗落毳毼

歇白塔鋪

甘山廬阜鬱長望林隙依稀

一作熹微

漏日光吳國晚蠶初

斷葉占城早稻欲移秧迢迢澗水隨人急冉冉巖花撲

馬香望眼儘從窮

一作窮

飛鳥遠白雲深處是吾鄉

西蜀楊耆二十年前見之甚貧今見之亦貧所
異於昔者蒼顏華髮耳女無美惡富者妍士
無賢不肖貧者鄙使其逢時遇合豈減當
世之士哉頃宿長安驛舍聞泣者甚怨問之
乃昔富而今貧者乃作一詩今以贈楊君

孤村漸

一作微

雨逐秋涼逆旅愁人怨夜長不寐相看唯

樗馬愁吟

一作悲歌

互答有寒蟬天寒滯穗猶橫畝歲晚空

機尚倚墻勸爾一杯聊復睡人間貧富海茫茫

贈人

別後休論信息疎
仙凡自古亦殊途
蓬山路遠人難到
霜栢威高道轉孤
舊賞未應亡楚國
新詩聞已滿皇都
誰憐澤畔行吟者
目斷長安貌欲枯

趙成伯家有姝麗
僕忝鄉人不肯開
樽徒吟春雪
謹依元韻以當一笑

繡簾朱戶未曾開
誰見梅花落鏡臺
試問高吟三十韻

俗云檢驗死秀才
帶上有詩三十韻


何如低唱兩三杯

世傳陶穀學士買
得党太尉家故妓

遇雪陶取雪水烹團茶謂妓曰
党家應不識此妓曰彼
麗人安有此景但能於銷金煖帳
下淺斟低唱喫羊羔
兒酒耳陶默然
媿其言
莫嫌衰鬢聊相映
須得纖腰與共回知道

文君隔青鎖梁園賦客敢言才

聊荅來句義取婦人而已罪過罪過



東坡全集卷二十八

欽定四庫全書

集部

東坡全集卷二十九

三十

詳校官庶吉士臣謝恭銘

檢討臣何思鈞覆勘

總校官進士臣朱鈐

校對官編修臣戴聯奎

謄錄監生臣郭在盤

欽定四庫全書

東坡全集卷二十九

宋 蘇軾 撰

詩一百一十六首

觀湖二首

乘槎遠引神仙客萬里清風上海濤回首不知沙界小
飄衣猶覺色塵高須彌有頂低垂日兜率無根下戴鰲
釋梵茫然齊劫火飛雲不覺醉陶陶

朝陽照水紅光開玉濤銀浪相徘徊山分宿霧儘寬遠

雲駕高風馳送來，昇霞影色歛殘灰。
及物氣燄明纖埃，可憐極大不知已。
浮生野馬悠悠哉。

寄高令

滿地春風掃落花，幾番曾醉長官衙。
詩成錦繡開胸臆，論極冰霜繞齒牙。
別後與誰同把酒，客中無日不思家。
田園知有兒孫委，早晚扁舟到海涯。

獄中寄子由二首

聖主如天萬物春，小臣愚暗自忘身。
百年未滿先償債，

十口無歸更累人是處青山可埋骨他年夜雨獨傷神
與君世世為兄弟更結人間未了因

栢臺霜氣夜淒淒風動琅璫月內低夢遶雲山心似鹿
魂飛湯火命如鷄眼中犀角真吾子身後牛衣愧老妻

百歲神遊定何處桐鄉知葬浙江西

獄中聞湖杭民為
余作解厄齋經月

所以有此句也朱邑
葬桐鄉犀角杜琮事

出獄次前韻二首

百日歸期恰及春殘生樂事最關身出門便旋風吹面

走馬聯翩鵲啅人却對酒杯渾是夢試拈詩筆已如神
此災何必深追咎竊祿從來豈有因

平生文字為吾累此去聲名不厭低塞上縱歸他日馬
城中不鬪少年鷄休官彭澤貧無酒隱几維摩病有妻

堪笑睢陽老從事為余投檄向江西

子由聞余下獄乞
以官爵贖罪貶筠

州監
酒

寄子由

厭暑多應一向慵銀鈎秀句並疎通也知堆案文書滿

未暇開軒硯墨中
湖面新荷空照水
城頭高柳謾搖風
吏曹不是尊賢事
誰把前言語化工

詩送交代仲達少卿

此身無用且東來
賴有江山慰不才
舊尹未嫌衰廢久
清尊猶許再三開
滿城遺愛知誰繼
極目扁舟挽不回
歸去青雲還記否
交遊勝絕古城隈

次韻馬元賓

流落江湖萬里歸
相逢自慰已差池
初聞好句驚人倒

悔過東庭識面遲握手寧知無賀監結交誰復許袁絲
塞鴻正欲摩天去垂老追攀豈可期

第五橋

白露淒風洗瘴烟夢回相對兩淒然
雀羅廷尉非當日
鳩杖先生愈少年
世事飽諳思縮手
主恩未報恥歸田
誰憐第五橋東水
獨照台州老鄭虔

次韻完夫再贈之什
某已卜居毘陵與完夫有
廬里之約云

柳絮飛時笋籜斑風流二老對開闢雪芽為我求陽羨
乳水君應餉惠山竹簟水風眠晝永玉堂制草落人間
應容緩急煩閭里桑柘聊同十畝閒

和林子中待制

兩翁留滯各皤然人笑迂疎老更堅共把鷺兒

一作一鵝夷

樽酒相逢卵色五湖天江邊遺愛啼斑白海上先聲入
管絃早晚淵明賦歸去浩歌長笑老斜川

九日袁公濟有詩次其韻

古來靜治得清閒我愧真常也一班舉酒東榮挹江海
回樽落日勸湖山平生傾蓋悲歡裏早晚抽身簿領間
笑指西南是歸路倦飛弱羽久知還

和吳安持使者迎駕

小雪疎烟雜瑞光清波寒引御溝長曛曛日色籠丹禁
杳杳鞭聲出建章鵷鷺偶叨陪下列天閤聊啟望中央
歸來喜氣傾新句滿座疑聞錦繡香

鹿鳴宴

連騎忽忽畫鼓喧喜君新奪錦標還金罍浮菊催開宴
紅蕊將春待入關他日曾陪探禹穴白頭重見賦南山
何時共樂昇平事風月笙簫一夜間

次韻張甥崇美畫眠

炎歊五月北牕涼更覺甘如飯稻粱宰我糞墻譏敢避
孝先經笥諳兼忘憂虞心謝知時雁安穩身同挂角羊
要識熙熙不爭競華胥別是一仙鄉

真興寺閣禱雨

太守親從千騎禱神翁遠借一盃清雲陰黯黯將噓遍
雨意昏昏欲醞成已覺微風吹袂冷不堪殘日傍山明
今年秋熟君知否應向江南飽食稔

惠州近城數小山類蜀道春與進士許穀野步
會意處飲之且醉作詩以記適參寥專使欲
歸使持此以示西湖之上諸友庶使知余未
嘗一日忘湖山也

夕陽飛絮亂平蕪萬里春前一酒壺鐵化雙魚沉遠素

劍分二嶺隔中區
花曾識面香仍好
鳥不知名聲自呼
夢想平生消未盡
滿林烟月到西湖

送蜀僧去塵

十年讀易費膏火
盡日吟詩愁肺肝
不解丹青追世好
欲將芹芷薦君盤
誰為善相寧嫌瘦
復有知音可廢彈
拄杖挂經須倍道
故鄉春蕨已闌干

曾元恕遊龍山呂穆仲不至

青春不覺老
朱顏強半銷
磨簿領間愁
客倦吟花以酒

佳人休唱日銜山共知寒食明朝過且赴僧牕半日閒
命駕呂安邀不至浴沂曾點暮方還

黃河

活活何人見混茫崑崙氣脈本來黃濁流若解污清濟
驚浪應須動太行帝假一源神禹跡世流三患梗堯鄉
靈槎果有仙家事試問青天路短長

壬寅重九不預會獨遊普門寺僧閣有懷子由
花開酒美盡不歸來看南山冷翠微憶弟淚如雲不散

望鄉心與雁南飛
明年縱健人應老
昨日追歡意正違
不問秋風強吹帽
秦人不笑楚人譏

小飲公瑾舟中

青泥赤日午相烘
走訪

一作扣

船牕柳影中
輟我東坡無

限睡賞君南浦
不貲風坐觀
邸報談迂叟
閒說滁山憶
醉翁此去澄江三萬頃
只應明月照還空

鄧滁人也是日坐中觀邸

報云叟已押
入門下省

和子由次王鞏韻如囊之句可為一噓

平生未省為人忙
貧賤安閒氣味長
粗免趨時頭似葆
稍能忍事腹如囊
簡書見迫身今老
樽酒聞呼首一昂
欲挹天河聊自洗
塵埃滿面鬢眉黃

僂耳

霹靂收威莫雨開
獨憑欄檻倚崔嵬
垂天堆霓雲端下
快意雄風海上來
野老已歌豐歲語
除書欲放逐臣回
殘年飽飯東坡老
一壑能專萬事灰

荅李端叔

若人如馬亦如班笑履壺頭出玉闕已入西羌度沙磧
又來東海看濤山識君小異千人裏慰我長思十載間
西省憐君

一作鄰居

時邂逅相逢有味是偷閒

立春日病中邀安國仍請率禹功同來僕雖不
能飲當請成伯主會某當杖策倚几於其間
觀諸公醉笑以撥滯悶也

孤燈照影夜漫漫拈得花枝不忍看白髮欹簪羞彩勝
黃耆煮粥薦春盤東方烹狗陽初動南陌爭牛臥作團

老子從來興不淺向隅誰有滿堂歡

齋居卧病禁烟前辜負名花已一年此日使君不强喜
新春風物為誰妍青衫公子家千里白首先生杖百錢
曷不相將來問病已教呼取散花天

和參寥見寄

黃樓南畔馬臺宮雲月娟娟正點空欲共幽人洗筆硯
要傳流水入絲桐且隨侍者尋西谷莫學山僧老祝融
待我西湖借君去一杯湯餅潑油葱

東園

岑寂東園可散愁
膠膠擾擾夢神州
萬竿苦竹旌旗卷
一部鳴蛙鼓吹收
雨後月前天欲冷
身閒心遠地偏幽
杜門謝客恐生謗
且作人間鵬鷖遊

奉和陳賢良

不學孫吳與六韜
敢將驚馬並英豪
望窮海表天還遠
傾盡葵心日愈高
身外浮名休瑣瑣
夢中歸思已滔滔
三山舊是神仙地
引手東來一釣鼇

秋興三首

野鳥游魚信往還此身同寄水雲間誰家晚吹殘紅葉
一夜歸心滿舊山可慰摧頽仍健食此生通脫屢酡顏
年華豈是催人老雙鬢無端只自斑

故里依然一夢前相携重上釣魚船嘗陪大幙今陳迹
謬忝承明愧昔年報國無成空白首退耕何處有名田
黃鷄白酒雲山約此計當時已浩然

浴鳳池邊星斗光宴餘香滿上書囊樓前夜月低韋曲

雲裏車聲出未央
去國何年雙鬢雪
黃花重見一枝霜
傷心無限厭厭夢
長似秋宵一倍長

夜直秘閣呈王敏甫

蓬瀛宮闕隔埃氛
帝樂天香似許聞
瓦弄寒蟾駕卧月
樓生晴靄鳳盤雲
共誰交臂論今古
只有閒心對此君
大隱本來無境界
北山猿鶴謾移文

題永叔會老堂

三朝出處共雍容
歲晚交情見二公
乘興不辭千里遠

放懷還喜一樽同嘉謀定國垂青史盛事傳家有素風
自顧纓塵猶未濯九霄終日羨冥鴻

次韻參寥寄少游

巖棲木石已皤然交舊何人慰眼前素與畫公心印合
每思秦子意珠圓當年步月來幽谷拄杖穿雲冒夕烟
臺閣山林本無異故應文字不離禪

謝曹子方惠新茶

陳植文華斗石高景公詩句復稱豪數奇不得封龍額

祿仕何妨有馬曹
橐簡久藏科斗字
銛鋒新瑩鸛鵲膏
南州山水能為助
更有英辭勝廣騷

題潭州徐氏春暉亭

曛曛曉日上三竿
客向東風竟倚欄
穿竹鳥聲驚步武
入簷花影落盃盤
勿嫌步月臨玄圃
冷笑乘槎向海灘
勝槩直應吟不盡
憑君寄與畫圖看

贈仲勉子文

雨昏南浦曾相對
雪滿荊州喜再逢
有子才如不羈馬

知君心似後凋松閒看書冊應多味老傍人門想更慵
何日晴軒觀筆硯一杯相屬更從容

講武臺南有感

山城九月冒朝寒講武臺南路屈盤騶子雨中乘馬去
村童烟外倚牆看鷓鴣啼冢木秋風急鷺立漁船夜水乾
花似去年堪折贈揮花人去淚闌干

題寶鷄縣斯飛閣

西南歸路遠蕭條倚檻魂飛不可招野闊牛羊同雁鷺

天長草樹接雲霄昏昏水氣浮山麓汎汎春風弄麥苗
誰使愛官輕去國此身無計老漁樵

重遊終南子由以詩見寄次韻

去年新柳報春回今日殘花覆綠苔溪上有堂還獨宿
誰人無事肯重來古琴彈罷風吹座山閣醒時月照盃
嬾不作詩君錯料舊逋應許過時陪

次韻和子由欲得驪山沉泥硯

舉世爭稱鄴瓦堅一枚不換百金頒豈知好事王夫子

自採臨潼繡領山經火尚含泉脈暖弔秦應有淚痕潛
封題寄去吾無用近日從戎擬學班

次韻子由彈琴

琴上遺聲久不彈琴中古意本長存苦心欲記常逃舊
信指如歸自著痕應有仙人依樹聽空教瘦鶴舞風騫
誰知千里溪堂夜時引驚猿撼竹軒

和晁美叔

反觀皆自直相詆競誰諛事過始堪笑夢中今了無珍

材尚空谷疲馬正長途未識造化意茫然同一爐

再次前韻

係織錦圖
上回文

春機滿織回文錦粉淚揮殘露井桐人遠寄情書字小
柳絲低日晚庭空

紅牋短寫空深恨錦句新翻欲斷腸風葉落殘驚夢蝶
戍邊回雁寄情郎

羞雲斂慘傷春暮細縷詩成織意深頭伴枕屏山掩恨
日昏塵暗玉牕琴

和人回文五首

紅牕小泣低聲怨永夕春寒斗帳空中酒落花飛絮亂
曉鶯啼破夢忽忽

同誰更倚閒牕繡落日紅扉小院深東復西流分水嶺
恨無愁續斷絃琴

寒信風飄霜葉黃冷燈殘月照空牀看君寄意傳文錦
字字縈愁寫斷腸

前堂畫燭夜凝淚半夜清香荔惹衾烟鎖竹枝寒宿鳥

水沉天色霽橫參

蛾翠斂時聞燕語淚珠彈處見鴻歸多情妾似風花亂
薄倖郎如露草晞

次韻參寥詠雪

朝來處處白氍毹鋪樓閣山川盡一如總是爛銀并白玉
不知奇貨有誰居

嵇紹似康

并引

王凌謂賈充曰汝非賈梁道之子耶乃欲以國與人由

此觀之梁道之忠於魏也久矣司馬景王既執凌而歸
過梁道廟凌大呼曰我大魏之忠臣也及司馬景王病
見凌與梁道守而殺之二人者可謂忠義之至精貫於
幽明矣然梁道之靈獨不能已其子克之姦至使首發
成濟之事此又理之不可曉者也故余嘗戲作小詩云
嵇紹似康為有子郝超叛鑒似無孫如今更恨賈梁道
不殺公閭殺子元

移合浦郭功甫見寄

君恩浩蕩似陽春
合浦何如在海濱
莫趁明珠弄明月
夜深無數採珠人

過太行

自過太行至開潮陽吳
子野出家共十九篇

始余赴中山連日風埃未嘗了了見太行也意頗以為
恨今將適嶺表過臨城道中天氣肅然西山草木皆可
數忽悟笑曰余南遷其必返乎此退之衡山之祥也乃
作小詩

逐客何人著眼看
太行千里送征鞍
未應愚谷能留抑

可獨衡山解識韓

惠州一絕

羅浮山下四時春
盧橘楊梅次第新
日啖荔枝三百顆
不妨長作嶺南人

送佛面杖與羅浮長老

十方三界世尊面
都在東坡掌握中
送與羅浮德長老
携歸萬竅總號風

過子忽出新意以山芋作玉糝羹色香味皆奇

絕天上酥陀則不可知人間決無此味也

香似龍涎仍釀白味如牛乳更全清莫將北海金蠶鱗
輕比東坡玉糝羹

次韻功父觀余畫雪鵲有感二首

早知臭腐即神奇海北天南總是歸九萬里風安稅駕
雲鵬今悔不早飛

可憐倦鳥不知時空羨騎鯨得所歸玉局西南天一角
萬人沙苑看孤飛

追憶郭功父觀余舊畫雪鵲復作二韻寄之時

在惠州

平生才力信瑰奇
今在窮荒豈易歸
正似雪林樓上畫
羽翰雖好不能飛

復官北歸再次前韻

秋霜春雨不同時
萬里今從海外歸
已出網羅毛羽在
却尋雲跡帖天飛

蜀僧明操思歸龍丘子書壁

更厭勞生能幾日莫將歸思擾衰年
片雲會得無心否
南北東西只一天

武昌酌菩薩泉送王子立

送行無酒亦無錢勸爾一杯菩薩泉
何處低頭不見我
四方同此水中天

舉舊詩次今韻呈曇秀

春風何處不歸鴻非復羸牛踏舊蹤
但願老師真似月
誰家瓮裏不相逢

答海上翁

山翁不復見新詩疑是河南石壁曦海水豈容鯨飲盡
然犀何處覓瓊枝

占山亭二首

尚父提封海岱間南征惟到穆陵關誰知海上詩狂客
占得膠西一半山

我是膠西舊使君此山仍占與君分故應竊比山中相
時作新詩寄白雲

題懷素草帖

人人送酒不曾沽
終日松間掛一壺
草聖無成狂飲發
真堪畫作醉僧圖

雨中明慶賞牡丹

霏霏雨露作清妍
爍爍明燈照欲然
明日春陰花未老
故應未忍著酥煎

與王郎夜飲井水

吳興六月水泉溫
千頃荷花聚暗蚊
此井獨能深一丈

源龍如故亦如君

贈僧思誼

瀉湯舊得茶三昧
覓句近窺詩一斑
清夜漫漫因披覽

一作搜攬
齋腸那得許慳頑

子玉以詩見邀同刁丈遊金山

君年甲子未相逢
難向君前說老翁
更有方瞳八十一

奮衣矍鑠走山中

次韻致遠

長笑右軍稱草聖不如東野以詩鳴樂天自欲吟淮月
懷祖無勞聽角聲

次韻景文山堂聽第三首

忽憶韓公二妙姝琵琶箏韻落空無猶勝江左狂靈運
空鬪東昏百草鬚

馬上胡琴塞上姝鄭中丞後有人無詩成畫燭飄金燼
八尺英公欲燎鬚

荻花楓葉憶秦姝切切么絃細欲無莫把胡琴挑醉客

回看霜戟褚公鬚

成伯家宴造坐無由輒欲效顰而酒已盡入夜
不欲煩擾戲作小詩求數酌而已

道士令嚴難繼和僧伽帽小却空迴隔籬不喚鄰翁飲

挹窰須防吏部來

道士令悅神樂中所謂離而復合者
杜詩云肯與鄰翁相對飲隔籬呼取

盡餘
五

成伯席上贈所出妓川人楊姐

坐來真箇好相宜深注脣兒淺畫眉須信楊家佳麗種

洛川自有浴妃池

又答氍毹

卧病經旬減帶圍
清樽忘却故人期
莫嫌雪裏閒氍毹
作事由來未合時

往年宿瓜步夢中得小詩錄示民師

吳塞蘼葭空碧海
隋宮楊柳只金堤
春風自恨無情水
吹得東流竟日西

送范德孺

漸覺東風料峭寒青蒿黃韭試春盤遙想慶州千嶂裏
暮雲衰草雪漫漫

陸蓮庵

何妨紅粉唱迎仙來伴山僧到處禪陸地生花安足怪
而今更有火中蓮

僕年三十九在潤州道上過除夜作此詩又二
十年在惠州錄之以付過

寺官官小未朝參紅日半牕春睡酣為報鄰鷄莫驚覺

更容殘夢到江南

釣艇歸時菖葉雨
綠車鳴處楝花風
長江昔日經遊地
盡在如今夢寐中

壽陽岸下

街東街西翠幄成
池南池北綠錢生
幽人獨來帶殘酒

一作雨 偶聽一作聞得黃鸝第一聲

戲荅王都尉傳柑

侍史傳柑玉座傍
人間草木盡天漿
寄與維摩三十顆

不知蒼苔是餘香

舉輕明重維摩猶三十技

萬州太守高公宿約遊岑公洞而夜雨連明戲

贈二小詩

肩輿欲到岑公洞正怯衝泥傍險行定是岑公閱清境
春江一夜雨連明

蓬牕高枕雨如繩恰似糟牀壓酒聲今日岑公不能飲
吾儕猶健可頻傾

遊中峯盃泉

石眼盃泉舉世無要知杯度是凡夫可憐狡獪維摩老
戲取江湖入鉢盂

憩寂圖

東坡雖是湖州派竹石風流各一時前世畫師今姓李
不妨還作輞川詩

送柳宜歸

折脚鐺邊煨淡粥曲枝桑下飲離盃書生不是南遷客
魑魅驚人須早回

寒具

乃捻頭出劉
禹錫佳語

纖手搓來玉數尋，
碧油輕蘸嫩黃深。
夜來春睡濃於酒，
壓襖佳人纏臂金。

參寥惠楊梅

新居未換一根椽，
只有楊梅不直錢。
莫共金家鬪甘苦，
參寥不是老婆禪。

雨夜宿淨行院

芒鞋不踏利名場，
一葉輕

一作虛

舟寄渺茫林下對牀聽。

夜雨靜無燈火照淒涼

送惠州監押

一聲鳴

鴻一作

雁破江雲萬葉梧桐卷露銀我自飄零是

羈旅更堪秋晚送行人

過黎君郊居

半園荒草沒佳蔬煮得占禾半是諸萬事思量都是錯
不如還叩仲尼居

贈王覲

何人生得寧馨子
今夜初逢掣筆郎
莫怪圍碁忘瓜葛
已能作賦繼靈光

太夫人以无咎生日置酒書壁一絕

壽樽餘瀝到朋簪
要與郎君夜語深
敢問阿婆開後閣
井中車轄任浮沉

余舊在錢塘伯固開西湖今方請越戲謂固可
復來開鏡湖伯固有詩因次韻

已分江湖送此生
會稽行復得岑成
鏡湖席卷八百里

坐嘯因君又得名

召伯梵行寺山茶

山茶相對阿

本一作

誰栽細雨無人我獨來說似與君君

不會

一作見

爛紅如火雪中開

奉和成伯蕪戲禹功

金錢石竹道傍秋翠帶紅裙馬上謳無限小兒齊拍手
山公又作習池遊

洗兒

人皆養子望聰明我被聰明悞一生惟願孩兒愚且魯
無災無難到公卿

病後醉中

病為兀兀安身物酒作蓬蓬入腦聲堪笑錢塘十萬戶
官家付與老書生

劉監倉家煎米粉作餅子余云為甚酥潘邠老
家造逡巡酒余飲之莫作醋錯著水來否後
數日余携家飲郊外因作小試戲劉公求之

二首

一杯連坐兩髯棋數片深紅入座飛十分
潑灑君休訴

且看桃花好面皮

唐詩云未有桃花面皮先作杏子眼孔

野飲花間百物無杖頭惟挂一葫蘆已傾潘子錯著水
更覓君家為甚酥

夢中絕句

揪樹高花欲挿天暖風遲日共茫然落英滿地君方見
惆悵春光又一年

元翰少卿寵惠谷簾水一器龍團二枚仍以新
詩為貺歎味不已次韻奉和

巖垂足練千絲落雷起雙龍萬物春此水此茶俱第一
共成三絕景中人

藏春塢三首

退之身外無窮事子美生前有盡花更有多情君未識
不隨柳絮落人家

莫尋羣玉峯頭路莫看玄都觀裏花但解閉門留我住

主人休問是誰家

朱閣前頭露井多
碧桃枝下美人過
寒泉未必能如此
奈有銀牀素綆何

東坡全集卷二十九